

## **PRILOG 2.**

### *PRIJEDLOZI SSSBiH ZA IZMJENE I DOPUNE ZAKONA O STEČAJNOM POSTUPKU*

U toku javne rasprave o Nacrtu zakona o izmjenama i dopunama Zakona o stečajnom postupku Savez samostalnih sindikata BiH je uputio određene primjedbe i sugestije na ovaj zakon, koje su, prema mišljenju Sindikata, od ključnog značaja za ostvarivanje prava radnika u čijim firmama je pokrenut stečaj. Prema našim saznanjima, predlagač nije uvažio primjedbe Sindikata, a nemamo ni tačne informacije o tome u kojoj fazi je donošenje ovog zakona, odnosno da li je Vlada FBiH utvrdila prijedlog istog.

Ukoliko je Prijedlog zakona o izmjenama i dopunama Zakona o stečajnom postupku utvrđen, Savez samostalnih sindikata BiH predlaže Ekonomsko-socijalnom vijeću FBiH da zauzme stav na osnovu kojeg će Vlada Federacije BiH uložiti amandmane na pomenuti zakon, a koji sadrže sljedeće primjedbe i sugestije Saveza samostalnih sindikata BiH na isti:

**U članu 9. osnovnog Zakona u stavu 1.** brisati tačku i dodati tekst:

„i mora se okončati najkasnije u roku od dvije godine.“

Obrazloženje: Svjedoci smo da veliki broj stečajnih postupaka, najčešće bez opravdanog razloga, traje i po nekoliko godina, čime se dodatno umanjuje stečajna masa i ugrožava ionako težak materijalni i socijalni položaj radnika stečajnog dužnika, koji godinama nisu u stanju ostvariti ni minimalna, važećim zakonom zagarantovana potraživanja iz stečajne mase. Pored navedenog, svjedoci smo i da umanjivanje stečajne mase nerijetko dovodi do praktičnog prerastanja stečajnog u likvidacioni postupak i nestanak firme.

**U članu 33. osnovnog Zakona stav 2.** mijenja se i glasi:

„Prije ostalih stečajnih povjerilaca, ali poslije povjerilaca iz stava 1. ovog člana namiruju se zaposlenici stečajnog dužnika sa cjelokupnim potraživanjima iz radnog odnosa. Isto vrijedi i za plaćanje naknade štete za povrede na radu koja se isplaćuje u punom iznosu.“

Obrazloženje: S obzirom da su zaposlenici stečajnog dužnika, u praksi, najveći gubitnici i prije pokretanja stečajnog postupka, a i nakon pokretanja istog, smatramo da je opravdan zahtjev da oni imaju prvenstvo u namirivanju cjelokupnih potraživanja iz radnog odnosa, a ne samo osam zadnjih plaća kako je utvrđeno važećom odredbom. Ovo je trajan zahtjev sindikata koji je istaknut i u Stavovima Saveza samostalnih sindikata BiH za dopunu dokumenta “Osnove za formiranje vlasti u Federaciji BiH i platforma zajedničkog nastupa u institucijama BiH u mandatnom periodu 2010-2014, te prihvaćen od političkih subjekata koji su formirali vlast na nivou FBiH. Također napominjemo da su evropska zakonodavstva prihatala ovakvo rješenje.

**U članu 74. osnovnog Zakona stav 2. se briše.**

Obrazloženje: Postojeća odredba stava 2. člana 74. važećeg zakona je u koliziji sa predloženom izmjenom člana 33. stav 2. istog.